

दिनांक 23.02.2025
समय: 18.45 बजे

आकाशवाणी जयपुर-अजमेर ऊं पेश है

प्रादेशिक समाचार

- प्रधानमंत्री नरेन्द्र मोदी आकाशवाणी ऊं **मन की बात कार्यक्रम** मांय कह्यो-भारत ए. आई. रा हलका मांय मजबूत पिछाण बण रह्यो है।
- मुख्यमंत्री भजन लाल शर्मा ने पढ़ेसरां ऊं डिग्री ने कामयाबी रे साथे ई जिम्मेदारी मानण री अरज करी- वणा जोधपुर रा एन.एल.यू. मांय दीक्षांत जळसा मांय भाषण कर्यो।
- प्रधानमंत्री नरेन्द्र मोदी काले पी.एम. किसान सम्मान निधि योजना री 19वीं किश्त जारी करेला-राज्य थर रो आयोजन जयपुर रा राज्य कृषि प्रबंध संस्थान मांय व्हेला।
- आईसीसी चैंपियंस ट्रॉफी क्रिकेट होड़ मांय पाकिस्तान री टीम भारत सामी जीतण सारु 242 रन रो लगस राख्यो।

000

प्रधानमंत्री नरेन्द्र मोदी कह्यो है के आर्टिफिशियल इंटेलिजेंस-ए आई रा हलका मांय भारत तेजी ऊं आप री मजबूत पिछाण बणा रह्यो है। आकाशवाणी रा मन की बात कार्यक्रम मांय आज श्री मोदी कह्यो के भारत रा लोग नुवी प्रौद्योगिकी अपणावण मांय किणी ऊं पाछे नी है। प्रधानमंत्री इण बात माथे ध्यान दिरायो के नौजवानां री भागीदारी ऊं अंतरिक्ष अर आर्टिफिशियल इंटेलिजेंस जस्या न्यारा-न्यारा हलकां मांय नुवी क्रांति आय री है। वणा इण बात माथे मान जतायो के देश लारला मीना इसरो री मार्फत आप रो एक सौ वो रॉकेट छोड़्यो। श्री मोदी कह्यो के इसरो री कामयाबी रो दायरो घणो है।

.....
प्रधानमंत्री ई म्हीना री 28 तारीख ने राष्ट्रीय विज्ञान दिवस मनावण ने देखता सुणण वाळां ने आप रो एक दिन वैज्ञानिक रा रूप मांय बितावण रो सुझाव दियो। वणा कह्यो के सुणण वाळां किणी अनुसंधान प्रयोगशाला, तारामंडल अर अंतरिक्ष केन्द्र जस्सी ठौड़ा माथे जा सके है। श्री मोदी महिलावां रा बारा मांय आप रा विचार साझा करता कह्यो के देश री मातृशक्ति स्वतंत्रता संग्राम अर संविधान निर्माण समेत सगळा हलका मांय महताऊ भूमिका निभाई है।

.....
प्रधानमंत्री ऐलाण कर्यो के 8 मार्च ने अंतर्राष्ट्रीय महिला दिवस माथे वे एक्स अर इंस्टाग्राम जस्या आप रा सोशल मीडिया अकाउंट, एक दिन सारु कुछ प्रेरक महिलावां ने सूपेला जिण न्यारा-न्यारा हलका मांय कामयाबी हासिल करी है, अर आप री न्यारी पिछाण बणायी है। वणा कह्यो के महिला दिवस माथे महिलावां प्रधानमंत्री रा एक्स अर इंस्टाग्राम अकाउंट ऊं पूरी दुनिया ताई आप री बात पूगावण रा मौका रो फायदो उठा सके है। प्रधानमंत्री उत्तराखंड मांय राष्ट्रीय खेलां रा रोमांच री ई चर्चा करी जटे, 11 हजार ऊं बत्ती खिलाड़ियां शानदार प्रदर्शन कर्यो। श्री मोदी सब ऊं बत्ती सोना रा तमगा जीतण वाळी सेना री टीम ने बधाई दी। वणा कह्यो के आपा रा घणखरां खिलाड़ी खेलो इंडिया अभियान की देन है। मन की बात कार्यक्रम श्री मोदी देश री वनस्पति अर जीव-जंतुआं ने बचावण ऊं जुड़्या कामां मांय सक्रिय भाग लेवण सारु देश रा जनजातीय लोगां रे प्रति आभार जतायो। प्रधानमंत्री मोदी कह्यो के जंगली जीव संरक्षण ऊं जुड़्या लोगां री कोशिश रे कारण लारला कुछ साला मांय बाघा, तेंदुआं, एशियाई शेर अर बारहसिंघां री

आबादी तेजी ऊं बधी है। आवता म्हीना रे सरू मांय विश्व वन्य जीव दिवस रो आयोजन व्हेणो है। प्रधानमंत्री सगळां ऊं वन्य जीव संरक्षण ऊं जुड्या लोगां ने बधावो देवण री अरज करी। ई कार्यक्रम रे आखिर मांय प्रधानमंत्री नरेन्द्र मोदी बोर्ड री परीक्षा मांय हिस्सो ले रह्या परीक्षा योद्धवां ने शुभकामनावां दी। वणा पढेसरा ऊं कह्यो के बिना तनाव रे सकारात्मक भावना रे साथे आप रा इम्तिहान देवे।

000

मुख्यमंत्री भजन लाल शर्मा कह्यो है के पढेसरा आप री सनद ने कामयाबी रे साथे जिम्मेदारी ई माने। वणा कह्यो के पढेसरां ने जिन्दगी रा सूत्र सीखण, समझण सारू संदेनशील बणणो जरूरी है। वे जोधपुर रा राष्ट्रीय विधि विश्वविद्यालय रा 17 वां दीक्षांत जळसा मांय बोल रह्या हा। मुख्यमंत्री कानून रा पढेसरा री न्याय री हिफाजत अर प्रसार सारू काम करण ने कह्यो। वणा वकीलां ऊं कमजोर तबका सारू काम करण री अरज करी।

ई मौके मुख्यमंत्री तीन नुवा आपराधिक कानूनां रा जिक्रो करता कह्यो के सरकार राज्य मांय इण ने लागू करण सारू काम कर री है। जळसा मांय मुख्यमंत्री 181 सनद बांटी। आ मांय 118 स्नातक, 45 स्नातकोत्तर, 45 एमबीए रा 11 अर 9 शोध करण वाळां भेळा है।

000

प्रधानमंत्री नरेन्द्र मोदी काले बिहार रा भागलपुर ऊं प्रधानमंत्री किसान सम्मान निधि योजना री 19 वी किश्त जारी करेला। इण री मार्फत देश भर रा नौ करोड सत्तर लाख ऊं बत्ती काश्तकारां ने 21 हजार 500 करोड़ रुपया ऊं बत्ती री सीधी मदद मिलेला। अठिने राज्य थर रो जळसो जयपुर मांय व्हेला। ओ जळसो दुर्गापुरा रा **राज्य कृषि प्रबंध संस्थान** मांय व्हेला। इण मांय राज्य रा 72 लाख ऊं बत्ती काश्तकारां रो बैंक खाता मांय चौदह सौ करोड़ रुपया ऊं बत्ती री रकम हस्तान्तरित करी जायेला। प्रदेश रा सगळा जिला मांय ई अ जळसा व्हेला।

000

राज्यपाल हरिभाऊ बागडे आज झुंझुनूं रा दौरा माथे रह्या। श्री बागडे कलेक्ट्रेट मांय सरकारी योजनावां री समीक्षा करी अर योजनावां रो फायदो लोगां ताई पूगावण सारू अहलकारां ने निर्देश दिया। इण रे पछे राज्यपाल भोमपुरा गांव मांय एक एन.जी.ओ. कानी ऊं व्ह्या कार्यक्रम मांय 63 महिलावां ने लखपति सखी बणण माथे सनमानित कर्या ई मौके श्री बागडे कह्यो के महिलावां रे आत्मनिर्भर बणण ऊं ई देश तरक्की कर सकेला। कार्यक्रम मांय सामाजिक न्याय अर अधिकारिता मंत्री अविनाश गहलोत ई मौजूद रह्या।

000

उपमुख्यमंत्री प्रेमचंद बैरवा कह्यो के राज्य रो अबार रो बजट आमजन रो बजट है। वे आज भीलवाड़ा मांय मीडिया सामी बोल रह्या है। वणा कह्यो के बजट समावेशी विकास अर सगळा लोगां रा हितां ने ध्यान मांय रखता पेश करी ज्यो है। श्री बैरवा कह्यो के लारला बजट रा 80 फीसदी काम पूरा व्हे चुक्या है।

इण ऊं पैला श्री बैरवा कलेक्ट्रेट परिसर मांय बजट क्रियान्वयन ने ले र अहलकारां रे साथे मीटिंग करी अर चाल रह्या कामां ने बेगा निपटावण रा निर्देश दिया। ई दौरान वणा विकास प्रदर्शनी ने देख ने राजीविका ऊं जुड़ी महिलावां रो हौसलो ई बधायो। राज्य रा पेश करी ज्या बजट रा प्रचार-प्रसार अर ऐलाना ने बगतसर करावण रा मकसद ऊं सगळा प्रभारी मंत्री आप-आप रा हलकां रो दौरा कर रह्या है। इणी कड़ी मांय उपमुख्यमंत्री दीया कुमारी ई अजमेर मांय प्रशासनिक अहलकारां अर जन नुमाइन्दा री समीक्षा मीटिंग करी।

राजसमंद मांय राजस्थान धरोहर प्राधिकरण रा अध्यक्ष ओंकार सिंह लखावत, जैसलमेर मांय प्रभारी मंत्री जसवंत सिंह विश्नोई, भरतपुर मांय जन संसाधन मंत्री सुरेश रावत बजट ऐलाना री समीक्षा करी। सगळां प्रभारी मंत्री आप री रपट काले सरकार ने संपेला। इण रे पछे इण ने राजस्थान संपर्क पोर्टल माथे अपलोड करी जायेला।

000

केंद्रीय श्रम अर रोजगार मंत्री डॉ. मनसुख मांडविया ने कह्यो है के देश ने आगे बधावण सारु सगळा ने मिल ने कोशिश करणी चाहिजे। वणा लोगां ऊं राष्ट्र हित रे प्रति आप रा कर्तव्यां री पालणा करण री अरज करी। श्री मांडविया आज जयपुर मांय भारतीय जनता पार्टी रा दफ्तर मांय प्रबुद्धजन संवाद सम्मेलन मांय बोल रह्या हा। सम्मेलन मांय वणा केन्द्र सरकार रा बजट री विशेषतावां ने विगतवार समझाया। सम्मेलन रे पछे खबरनवीसां सामी बोलता श्री मांडविया कह्यो के लारला दस साला मांय देश मांय घणो बदलाब आयो है अर एक नुवो भारत रो निर्माण व्हे रह्यो है। वणा कह्यो के देश री विरासत ने सहेजण री दिशा मांय बरोबर काम कर्यो जावे।

000

आईसीसी चैंपियंस ट्रॉफी क्रिकेट होड़ मांय पाकिस्तान भारत सामी जीतण सारु 242 रन रो लगस राख्यो है। आज दुबई रा इंटरनेशनल स्टेडियम मांय पाकिस्तान री टीम भारत सामी टॉस जीत ने पैला बल्लेबाजी करता 49 ऑवर अर 4 गेंद मांय 241 रण बणा आउट व्हे गयी। पाकिस्तान कानी ऊं सब ऊं बत्ती 62 रन सौद शकील बणाया। भारत रा कुलदीप यादव पाकिस्तान रा तीन विकेट चटकाया।

000

अबे खबर महाकुंभ ऊं —

प्रयागराज महाकुंभ मांय आध्यात्मिक अनुभव रे साथे-साथे स्वास्थ्य सेवा माथे ई खास ध्यान दियो जावे। इण रो एक खास आकर्षण नेत्र कुंभ है, जो निजर दोष ऊं निपटण रा मकसद ऊं सरु करी ज्यी। ई पहल रे तैत मेळा हलकां रा सेक्टर-6 मांय मुफ्त नेत्र जांच अर चश्मा मुहैया कराया जावे। महाकुंभ रा त्रिवेणी संगम माथे अजै ताई 60 करोड़ 74 लाख ऊं बत्ती सिरधालू डुबकी लगा चुक्या है। महाशिवरात्रि माथे 26 फरवरी ने आखिरी अर खास स्नान व्हेला। घणी तादाद मांय सिरधालूआं री भीड ने देखता मेळा प्रबंधन कानी ऊं सगळी तैयारियां तैय करी जावे अर बरोबर निगे राख्यी जावे।

000

फागण म्हीना री सरुआत रे साथे ई प्रदेश मांय फाग रो रंग छायीज ग्यो है। घरां अर देवालयां मांय फागोत्सव रा आयोजन व्हे रह्या है।

000